

Sumatin karimaut AIDS aweanes

Veronica Hatutasi
i raitim

...namba wan skul long wokim dispela

OL skul sumatin i wok long luksave long AIDS olsem wanpela bikpela birua we i ken bagarapim pipel na kantri sapos ol i no wokim samting nau.

Olsem na long nambawan taim, wanpela skul long Nesenel Kapitel Distrik bai karimaut "Peer HIV/AIDS aweanes long skul bilong ol long lainim ol arapela wanskul bilong ol long hevi AIDS i kamapim na rot long ol i ken bihainim long abrusim sik.

Stat long tude belotaim, sampela sumatin bilong Pot Mosbi Nesenel Hai skul insait long NCD husat i memba bilong NCD Studen na Yut Grup bai karimaut "AIDS Peer Awareness" long skul eria.

Presiden bilong grup, Robert lori Thomas, em wanpela Gret 12 sumatin i tok grup bilong em i bin tingting long karimaut aweanes long skul bikos ol i lukluk long futja o bihain taim bilong ol na kantri na long rot we dispela sik i go long em, bai bikpela mak bilong ol yangpela pipel i bagarap na pinis sapos ol i no mekim wanpela samting long helpim palt egensim dispela birua sik.

Robert i tok 5-pela



SIOS AID WOKSOP: Ol Katolik bisop na ol memba bilong ol arapela sios bin sindaun long AIDS woksop long Don Bosko Teknologikel Institut Konferens Senta long Pot Mosbi. Institut na Konferens senta i stap long naispela hap wantaim ol kain stail bilding ol Salesien kongrikese Bruder i kamapim bihainim kain stail disain bilong ol Katolik bilding long narapela hap bilong wol.

sumatin bilong Pot Mosbi Nesenel Hai skul i bin stap insait long grup i gat 28 sumatin bilong ol arapela skul long NCD i bin sindaun long Angliken Stop AIDS woksop long taim bilong skul malolo.

Em ol lain sumatin bilong Tokarara Hai, Sen Peter's Erima, de La Salle, Gerehu na moa.

"Long aweanes wok mipela i laik karimaut stat long tude, bai

mipela i tok klia long HIV/AIDS. Rot we yu ken abrusim o stopim long yu noken kisim na lukautim ol dispela i gat sik nogut. Na bai mipela yet i mas karimaut ol wok aweanes na ol arapela rot moa ol wanskul i harim na lukautim ol yet long dispela sik," Robert i tok.

Em i tok long rekot bilong Anglikea, Pot Mosbi Nesenel Hai skul we i gat moa long 800 Gret 11 na 12 sumatin,

em i namba wan skul insait long NCD na kantri we ol sumatin yet i go pas long karimaut AIDS aweanes.

Na Robert i autim tok amamas bilong em na grup i go long skul Prinsipel Lillian Ahai na ol tisa bilong em long larim ol sumatin i yusim skul long karimaut AIDS aweanes.

Robert i tok ol toktok long wokim dispela i bin stat las yia na olsem, long krismas

skul malolo, ol bin sindaun long Anglikea Stop AIDS woksop.

Em i tok moa olsem AIDS i bikpela moa long ol yangpela namel long 15 na 35 krismas na bikpela samting nau em i wok bilong yumi olgeta long mekim samting long senisim pasin na soim olsem yumi ken mekim samting bipo kantri na pipel, moa yet ol pikinini na yangpela, i bagarap olgeta.